

Gou iq seiz dingq gyoengq vunzlaux gangj, miz doiq lauxdoengz ndeu vunz ged, boux ndeu youq Mbanjuengz, vunz heuh de Laux-vuengz, lingh boux youq Mbanjbuen, vunz heuh de Lauxbuen. Baeznaengz song boux haenx cungj ra gak cungj gak yiengh lijyouz daengz ranznden ciq doxgaiq, lumjnaeuz ciq geng youz ndeu roxnaeuz ciq di gyu he. Vunz ndaw mbanj cungj dwg vunz soh, lai baez ciq neix youh ciq haenx, couh rox gyoengqde dwg vunzged lo, mbouj miz saek boux caiq nyienh caeug gyoengqde baedauq.

Miz ngoenz ndeu, Lauxbuen bae ranz Lauxvuengz guhhek, baez haeuj ranz couh naengh roengzdaej, ndatheiq dwk naeuz: “Lauxdoengz a, haemhlwenz gou caen boihseiz, gou bae dwk ndaej geij duz bya hung, genj song duz okdaeuj, aeu cag roix dwk venj youq gwnz gofaex bakdou, dajsuenq ngoenzneix soengq daeuj hawj mwngz, byawz rox deng duzmeuz gwn lo.” De doq gangj doq yaengx diuz cag hwnjdaej, “Mwngz yawj-yawj, couh lw diuz cag neix ndwi. Lauxdoengz, aen bak mwngz caen mbouj miz fuk, suenq lo, ngoenzlaeng gou caiq bae dwkbya, itdingh genj aeu song duz bya hung soengq daeuj hawj mwngz.”

Daengz banringz seiz, Lauxbuen roxnyinh dungxiek lo. De raen Lauxvuengz mbouj cawj haeux loengh byaek, couh daezsingj naeuz: “Aiyu, dan goq gangjavah, aen dungx iek lo.” Lauxvuengz dingq le ganjvaiq haeuj ndaw bakcauq bae loengh byaek.

Ngamq gvaq yaep he, Lauxbuen couh mup daengz baenz raq baenz raq heiq rang, rang dwk ndaeng yaek vang bae. De hemq naeuz: “Lauxdoengz, cungj dwg vunz ndawranz, genjdan di couh ndaej lo.” Lauxvuengz han naeuz: “Mbouj loengh lai, cij yungh rangz cau noh caeug cawj dang daeuhfouh.”

Byaek hwnj daiz lo, moix boux cungj miz vanj dang ndeu. Lauxbuen yawj ndaw dang, mbouj raen miz saek di daeuhfouh. Lauxvuengz naeuz:



“Haxbaenh duznou haeb gij daeuh-fouh, gou lau uq mbouj cuengq roengzbae lo.” Lauxbuen caiq yawj ndaw deb, ndawde cuengq geij gouh dawh. De siengj: Nanzdauh neix couhduw rangz cau noh? Lauxvuengz youh riu dwk cek naeuz: “Lauxdoengz, mwngz daeuj nguh lo, danghnaeuz mwngz dwg seizcin daeuj, couh ndaej gwn rangz oi lo, seizneix rangz gaengq geq lo.” Lauxbuen dingq le mbouj ok sing, gaem diuz beuzgeng hwnjdaej, menhmenh gwn dang.

Daengngoengz yaek doek cong lo, Lauxbuen siengj baema ranz. Ngamq yaek ok bakdou, mbwn sawqmwh doek fwn raq. Lauxbuen naeuz: “Lauxdoengz, ciq aen liengj mwngz hawj gou gang baema ba.” Lauxvuengz yienznaeuz mbouj cingznyienh ciq hawj de, hoeng youh lau de dauq haeuj ranz caj fwn dingz youh gwn doxgaiq, couh doq dawz aen liengjceij ciq hawj de lo.

Lauxbuen ma daengz ranz, yied ngeix yied ndatheiq. De dawz aen liengj dumz cuengq youq henz dou, naeuz: “Mwngz ged a, gou cungj mbouj gven aen liengj mwngz, doeklaeng rox soengq hawj dauq mwngz, ciq aen liengjceij hawj gou, daengz ranz ndang dumzcatcat.”

Caiq gangj Lauxvuengz mbiengj-

neix, caj Lauxbuen deuz le, de dawz vanj dang daeuhfouh caeug deb rangz cau noh ndeu okdaeuj, gwn dwk feihdauh raixcaix.

Ngoenz daihngaih, mbwn lij caengz rongh, Lauxvuengz couh hwnq cong lo. De baenzhwnz ninz mbouj ndaek, caenh siengj aen liengjceij de. Ciq aen liengjceij hawj Lauxbuen, de sim'in dangqmaz. De goq mbouj ndaej gwn haeux, ganjvaiq coh ranz Lauxbuen buet bae. Aenvih ngoenz-lwenz ngamq doek fwn, roen lij mbaeq, byaij dwk dinvaq de cungj dumz liux, lij miz namh, uquj dangqmaz.

Daengz ranz Lauxbuen, Lauxvuengz daj conghcueng yawj haeuj-bae, raen Lauxbuen lij ninz, aen liengjceij hai dwk cuengq youq baihlaeng dou. De ndatheiq dangq-maz, roengzrengz roq aen dou.

Lauxbuen deng roq sing lo, de bazlaz hwnqdaeuj hai dou. Lauxvuengz hozgaek dwk byaij haeujbae naengh youq gwnz daengq, naeuz: “Lauxdoengz, haxbaenh gou riuj bingz youz ndeu daeuj siengj soengq hawj mwngz, byawz rox daeuj daengz buenq roen dad mbat laemx ndeu, bingz huq lo, youz lae liux, lij lw aen bak bingz.” Gangj sat iet aen bak bingz okdaeuj. Lauxbuen naeuz: “Ye,

caen ieng lo.”

Lauxvuengz naeuz: “Gou daeuj caeux di, lij caengz gwn haeux, dungxiet lai, mwngz bae cawj di doxgaiq daeuj, gou gwn le caiq menh baema.” Lauxbuen naeuz: “Mwngz caj dwk, gou doq bae guh.” Gangj sat couh byaij haeuj bakcauq bae lo.

Sawqmwh dingqny dazgaeq swenjgakgak. Lauxvuengz hemq naeuz: “Lauxdoengz, loengh genjdan di couh ndaej lo.” Lauxbuen han naeuz: “Mbouj loengh maz, cij aeuq rek dang nohgaeq ndeu.” Lauxvuengz dingq le, roxnyinh Lauxbuen doiq swheij caen dwg ndei.

Byaek hwnj daiz lo, aen vanj hung baij youq naj. Lauxvuengz byaengq da cim yawj ndaw vanj, ngamq raen ndaw dang miz geij di gyaeqgaeq. De siengj: Nanzdauh neix couhduw dang nohgaeq? Lauxbuen cek naeuz: “Lauxdoengz a, mwngz daeuj mbouj deng seiz, danghnaeuz mwngz gvaq song sam ndwen menh daeuj, aen gyaq neix gaengq faeg ok baenz gaeqlwg, ciengx daengz seizhaenx couh miz song sam gaen lo. A, dang nohgaeq geijlai feih a!”

Lauxvuengz dingq le ndatheiq dangqmaz, de siengj ndaq geij coenz, hoeng gangj mbouj ok, cijndei ngaemgyaeuj gwn dang. Gwn liux le, Lauxvuengz naeuz: “Lauxdoengz, gou cinjbi baema lo, roen mbaeq lai, mwngz ciq gouh suihaiz mwngz hawj gou daenj baema, daengz mbwnbiengj roen hawq le gou menh soengq daeuj hawj mwngz.” Lauxbuen lauxlaux saedsaed dwk dawz gouh suihaiz ndenq hawj de. Lauxvuengz duet doiq haiz bonjfaenh, daenj doiq suihaiz Lauxbuen, gaem aen liengjceij swheij caeug doiq haiz dumz de baema lo.

Mbwn laep lo, Lauxvuengz yaek ninz lo, de yawj gouh suihaiz Lauxbuen, siengj: Mwngz dawz aen liengjceij gou baema ranz hai baenz hwnz, gou hix aeu daenj gouh suihaiz mwngz hwnz ndeu cij ndaej. Doeklaeng, de couh daenj gouh suihaiz Lauxbuen ninz lo.



Youq Bingzgoj Yen Haijsingz Yangh Hingzgiz Cunh mbanj Hingzgiz miz aen mboq he heuhguh mboqbyaj, aen mboq neix gig geizheih.

Aen gihvei dingjlingz ndeu, hawj gou bouxvunz gvaq buenq bak bi ndaej daengz bae ndaw Byayauz youz mbat ndeu.

Ngoenzhaenx, gou daiq song bouxmbauq daengz Haijsingz Yangh Hingzgiz Cunh guh gij hong baihrog, haetromh dou couh daengz Hingzgiz Cunh cunhvej lo.

Aen cunh neix cungj dwg bya rin, ndaw mbanj cungj dwg gyoengq Bouxyauz youq. Bouxvunz daeuj

ciepdaih, bang dou guh hong haenx dwg cunhvej fucujyin, heuhguh Vuz Cunggez, aen ranz de couhduw youq mbanj Hingzgiz. Aen cunhvejvei couh guh youq gwnz ngamhbya raeb mbanj Hingzgiz. Youq cunhvejvei doiqnaj ngeng miz vaengz raemx he lumj raengz youh lumj cingj, youq gwnz raemx fouz miz hauilai daeuzraez, yawj hwnjdaej dwghinj lai lo. Vuz Cunggez naeuz daengx mbanj cungj gwn raemx aen mboq neix. Gou baez dingq miz di mbouj rox baenzlawz dap lo, yawj gij doxgaiq fouz youq gwnz raemx, doeksaet dwk iet baez linx ndeu.

Riengzlaeng, gou doiq Vuz fucujyin naeuz: “Wnggai goemq aen mboq neix hwnjdaej, gij raemx neix cij cinghseuq di ne!” De naeuz: “Mbouj ndaej goemq.”

“Vih gijmaz?” Gou gamjdaengz gig geizheih couh cam.

“Gyoengq vunzgeq ndaw mbanj naeuz, mbouj ndaej goemq. Aenvih aen mboq neix doeng mbwn, dwg aen mboqbyaj ndeu, cijaeu baez byajraez, aen mboq raemx couh hwnj lo.” Vuz

fucujyin dap naeuz.

Gou gig geizheih cam de: “Cij byajraez mbouj doek fwn raemx mboq neix hix hwnj ha?”

Vuz fucujyin naeuz: “Hix hwnj, hoeng hwnj ndaej menh, danghnaeuz youh byajraez youh doek fwn raemx couh hwnj ndaej engq vaiq lo, hwnj rim liux couh lae okrog daeuj, baiz daeuzraez okbae caez, gij raemx saw daengz raen daej, daj gwnz raemx daengz laj daej miz 6 mij lai laeg ne!”

Gou youh cam: “Danghnaeuz cij doek fwn mbouj byajraez ne?”

Vuz fucujyin naeuz: “Hix hwnj, hoeng hwnj ndaej ceiq menh, beij cij byajraez mbouj doek fwn vanzlij menh, couh lumj raemx ndaw mboq cij dwg gij raemxfwn, mbouj dwg daj conghmboq conh okdaeuj nei.”

Lajmbwn baenzlai hung, gij saeh maz geizheih cungj miz. Banhaemh dou lizhai mbanj Hingzgiz dauq ma lo, gou youq ndawsim laeglemx naemj: Ndae ra aen gihvei ndeu, ceiq ndei dwg byajraez doek fwn seiz, caiq daengz gizneix yawjyawj aen mboq-byaj neix.